



Medel

cun pezza imposanta



La vischnaunca da Medel al Pass Lucmagn cumpeggia l'entira vallada che consista da Curaglia sco liug principal e da siat uclauns. Medel ei suenter Val S. Pieder territorialmein la secund gronda vischnaunca sursilvana. La Val Medel ei tschinclada d'in tozzel imposants cuolms da 3000 meters che fascineschan ils alpinists, smanatschan denton era cun lavinas. La historia dalla Val Medel resda stedi da lavinas, bovas e stempraus che han destruiu la cuntrada e periclitau ed engreviau l'existenza dils indigens. Cull'avertura carrabla dil Lucmagn (1877), la via nova (1965) e l'avertura permanenta (2000) han passants fructificau ustrias e hotels dalla Val. Grazia all'exploataziun dallas auas ha la vischnaunca purila acquistau ina certa beinstonza. Scartas ein las piazzas da lavur ordeifer l'agricultura.

DA MARTIN CABALZAR

Ton il num Medel sco Lucmagn ein d'origin latin. Fertion che Medel e Fuorns regordan allas minieras installadas per l'exploataziun da metals fa Lucmagn allusiu ad in grond uaul. Ins suppona ch'in vegl passadi roman menavi sul Lucmagn ch'ei cun ses 1916 m s. m. il pli bass pass viers sid. Il transit ei vegnius promovius essenzialmein dalla claustra da Mustér che ha schau ereger gia baul hospezis a S. Gagl (1261) e S. Maria (1374). Enstagl dalla viafier planisada oriundamein ha il cantun eregiu 1877 ina via sul Lucmagn. La veglia baselgia parochiala ed il santeri dalla Val sesanflan a Platta. Da sia existenza intervegn ins en in document digl onn 1338. Da quei temps ed entochen 1454 era Medel ina filiala dalla pleiv da Mustér. Igl onn 1505 ei la baselgia veglia da Platta vegnida remplazzada cun ina baselgia gotica e 1744 ei igl edific sacral vegnius adattaus al stil baroc.

1642 han ins fundau a Curaglia in'atgna caplania. El decuors dil 17avel tschentaner ein tut en tut 12 baselgias e capluttas vegnidas eregidas ella Val Medel. Ellas sesanflan a Plattas (s. Martin), Curaglia (s. Clau), Acla (s. Giachen), Fuorns (s. Maria), Biscuolm (ss. Barla e Brigitta), Pali (s. Giusep), Mutschnengia (s. Bistgaun), Pardé (s. Roc), Sogn Gions (s. Gion Battesta), Sogn Gall (s. Gagl), Lucmagn (s. Maria) e Soliva (s. Pieder e s. Vincula).

Il prighel permanent da lavinas ha spuentau la glied digl anteriur liug principal, da Platta, aschia che Curaglia ha surpriu tec a tec la funcziun da capoliug che dat suttetg ton all'administraziun communal sco alla scola primara e dapi 1980 ad ina casa da vegls. Ella Tgasa communal (1985) ein integrat l'administraziun communal, la stizun, la posta, la banca, il local da pum-piers, il tschaler da refugi ed ils parcadis publics. Ils anteriurs uclauns da Casutt, Pali, Pardatsch e Biscuolm ein vegni bandunai el decuors dil 19avel tschentaner. Ad Acla han ins relaschau suenter la catastrofa da lavinas da 1975 in scamond da baghegiar. El decuors dils davos decennis han ins eregiu vasts rempars da lavinas sillas spundas dil Crap Stagias. Denton era las malauras digl onn 1987 ed il stemprau Vivian (1990) han caschunau gronds donnos vid igl uaul da schurmetg ed han pretendiu replontaziuns e novs rempars da schurmetg.

Sco ina dallas empremas vischnauncas sursilvanas ha Medel realisau la schanza d'ina migliur finanziaria entras l'exploataziun dallas auas. L'emprema concessiu per explotar las auas dalla Val Cadlmo ei vegnida concedida gia igl onn 1929. Ils tscheins d'aua annuals da rodund 1 milliun ein s'entelli beinvegnidas entradas en cassa communal. Plinavon profitescha il singul vischin d'energia favoreivla e dils access migliurai en connex cun las ovras hidrau-

licas. Dapi igl onn 2000 vegn la via sul Pass dil Lucmagn era tenuta aviarta durront igl unviern. Ils ustiers profiteschan dallas pausas dils passants. Malgrad la standardisaziun dil sursilvan han ils da Medel salvau lur genuin dialect medelin. Entgins tipics exempels persuenter ein: betg, tgaussas, tgauras, tgasa, cachel etc.

Fracziuns/Fraktionien

Fuorns, Pardé, Platta, Drual, Matergia, Curaglia, Mutschnengia, Soliva.

Diember da habitonts/Einwohnerzahl

1900: 492; 1950: 614; 2000: 470; 2008: 453

Lungatg/Sprache (2000)

436 romontsch, 27 tudestg, 7 auters

Surfatscha/Fläche

13 598 ha: 2421 agricol, 2026 uaul, 9093 nunpr.

Altezia sur mar/Höhe über Meer

Curaglia 1332, Rein 1097, Péz Medel 3211

Casadas/Haushaltungen

195 indigenas, 52 habitaziuns da vacanzas

Pernottaziuns/Übernachtungen

rodund 6825 (senza pauschalas)

Facultad e taglias/Vermögen und Steuern

– 1168.– frs./persuna 1722.– frs./persuna

Scolars/Schüler

4 scoletta, 31 primara, 22 superiura (Mustér)

Occupaziun/Beschäftigung

54% sectur I / 9% sectur II / 37% sectur III
32 purs da biestga, 15 purs da cauras e nuorsas
4 hotels, 2 stizuns, 2 camps da vacanzas, banca, mazlaria, 2 scrinariars, 2 garaschas, 2 transporturs, stagnaria, fravgia, architectura

Uniuns/Vereine

musica, chor mischedau e baselgia, catschadurs, tiradurs, skiunzs, purs, dunnas, giuventetgna etc.

President communal/Gemeindepräsident

Claudio Simonet

Canzlist communal/Gemeindekanzlist

Valentin Pally

Preschientscha sin internet/Internetportal

www.medel.ch